

FRÁSÖGN

af fjárfundi forsætisnefndar Vestnorræna ráðsins 29. janúar 2024.

Af hálfu Íslandsdeildar Vestnorræna ráðsins sóttu fundinn Steinunn Þóra Árnadóttir, formaður Íslandsdeildar, og Hildur Edwald, sérfræðingur í alþjóðamálum. Aðrir fundarmenn voru Jenis av Rana, formaður Vestnorræna ráðsins og formaður landsdeildar Færeyja, Poulá Árnadóttir, landsdeildarritari Færeyja, Aqqalu Jerimiassen, varaformaður grænlenku landsdeildarinnar, Atli Arnfinsson Thomassen, landsdeildarritari grænlenku landsdeildarinnar, og Lárus Valgarðsson, framkvæmdastjóri Vestnorræna ráðsins.

Meginefni fundarins var undirbúningur fyrir þemaráðstefnu, innri fund og fund forsætisnefndar Vestnorræna ráðsins í Tasiilaq dagana 4.–6. mars. Forsætisnefndin samþykkti dagskrá ráðstefnunnar og þátttakendalista sem og dagskrá innri fundar ráðsins sem einnig verður haldinn í Tasiilaq. Þá ræddi nefndin drög að reglum varðandi skiptingu útgjalda og ábyrgðar á fundum Vestnorræna ráðsins og ákvað að halda þeirri umræðu áfram á fundi sínum í Tasiilaq.

Þá ræddi nefndin veru og sýnileika Vestnorræna ráðsins á samfélagsmiðlum og heimasíðu ráðsins og hvernig best væri að sinna upplýsingastarfi fyrir ráðið og hver bæri ábyrgð þar á. Að lokum var rætt um 40 ára afmæli Vestnorræna ráðsins en árið 2025 verða 40 ár liðin frá stofnun ráðsins og ákveðið var að gefa út afmælisrit af því tilefni.

Frekari upplýsingar má nálgast hjá ritara Íslandsdeildar Vestnorræna ráðsins og á vefsvæðinu www.vestnordisk.is.